

永
定
河
志

永定河志目錄

卷十二

奏議三

雍正五年
至十三年

永定河志卷十二

奏議三

雍正五年二月初五日 和碩怡親王等

奏前事竊查雍正四年九月內直隸總督李紱題請
添設河員經臣等議覆於水利營田効力人員內
將諳練河務出力勤慎著有勞績者揀選補用等
因具奏奉

旨議得好著照所議行該部知道欽此欽遵在案今春

融凍解正值動工之時所有添設河員二十七缺
內北運河同知通判二缺最為緊要查有候選通
判朱斐文候選州同張培微係奉

旨交部另用之員臣等面

奏請以河員暫行補授已蒙

聖恩俯允今請以朱斐文暫補北運河同知缺張培微
暫補北運河通判缺其餘州同等缺臣等傳齊在
工各員公同揀選擬以候選通判汪鐸補天津州

州同缺候選通判李壇補涿州州判缺候選知縣
蔡學願補霸州州判缺河間縣縣丞高擢元補薊
州州判缺候選縣丞程毓麟補灤州州判缺候選
通判佟世龍補宛平縣縣丞缺候選通判袁松齡
補良鄉縣縣丞缺候選七品小京官宋模補固安
縣縣丞缺獻縣主簿劉啟補永清縣縣丞缺候選
州同李泰階補東安縣縣丞缺候選州判杜熄補
武清縣縣丞缺監生劉永清補要兒渡縣縣丞缺候

選知州汪士達補玉田縣縣丞缺遷安典史郝浩
補青縣主簿缺候選主簿朱明琦補宛平縣主簿
缺候選縣丞祝兆書補良鄉縣主簿缺候選主簿
王元卿補固安縣主簿缺候選縣丞顧廣生補永
清縣主簿缺候選州同職銜惲源濬補東安縣主
簿缺候選州同陳培補武清縣主簿缺候選主簿
李必顯補東楊村主簿缺候選縣丞蔡亨宜補豐
潤縣主簿缺候選州同洪時行補涿州吏目缺監

生遼天錦補霸州吏目缺候選正八品潘賓補霸
州清河吏目缺以上各官俱係辦事勤慎著有勞
績之員但各員銜缺多不相當今從河務需人起
見懇乞

皇上恩准勅部補授除陞補之朱斐文張培微程毓麟
高擢元劉啟邨浩以及監生劉永清遼天錦並銜
缺相當之王元卿李必顯十員照數陞轉外其汪
鐸等十七員仍照各員本銜陞轉再查朱斐文等

二十四員俱於雍正四年經臣等帶領引

見其劉啟郝浩蔡亨宜三員尚未引

見但現在工程緊要需員管理請俟伏秋汛後補行引

見恭候

命下之日即令該員等赴任辦理庶分理得人於河務
不無少補再雍正四年二月內九卿議得永定河
向來効力人員一概撤回奉

旨依議欽遵在案今據河道明壽詳稱筆帖式德庫納

阿拉米把總張義陳留才熟諳河務詳請留工辦事等語查永定河工最為緊要必得諳練之員董率新設河官辦理方保無虞應將德庫納阿拉米張義陳留才四員暫行留工効力一年如果實心効力著有勞績臣等

奏

聞請

旨臣等未敢擅便為此謹

奏本月初九日奉

旨怡親王奏請補授河工効力官朱斐文等二十七員
著俱照所請補授餘亦照所請行該部知道欽此

雍正五年二月十八日工部為欽奉

上諭事臣等查得管理天津水師營都統覺羅巴顏德
等奏稱臣等遵

旨修理工景山隄岸俱已告竣共用過內務府庫銀七
萬五千一百二十五兩零伏乞

皇上遣官查核至新修築隄岸奉

特旨動用內庫錢糧修築仰懇

皇上天恩仍交臣等同効力人員看守保固三年再交
永定河河道管理其委用監督禮部員外郎今陞
戶部郎中呂耀曾禮部員外郎尚崇坦令其回部
辦事光祿寺署正覺羅阿那哈戶部郎中王式曾
令其兩處行走其原任監督郎中傅爾賽應賠修
之工交與臣等修建之挑水壩四座石隄八丈前

支領過內務府庫銀四千五百兩實用銀三千八百三十兩五錢四分零餘銀六百六十九兩四錢五分九釐仍交內務府共傳爾賽應賠銀兩行文工部轉行該旗嚴追還項等因摺奏奉

旨著交部欽此欽遵移咨前來查石景山埽壩堤工關係緊要其金溝口隄至下壩臺等工奉

旨命都統覺羅巴顏德原任侍郎王景曾等支領內務府庫銀興修在案其石景山舊隄係臣部主事關

納看守因關納陞戶部員外郎臣部於雍正四年六月初九日另派司官前往看守等因摺奏奉

旨爾部每年派司官前往石景山看守隄工殊屬無益應否交與地方官或永定河道管理之處爾部會同怡親王議奏欽此臣部會同怡親王議得石景山隄工每年派出司官看守不過僅有看守之名究於隄工無益若交與永定河道管理則事有專責又況每年更換實未允協但現今永定河道覺羅明

壽管理新舊河務所交之事甚多目今正值伏汛之時若即將石景山隄工交伊管理恐此時暫且不能兼顧且巴顏德王景曾所修工程尚未告竣監督關納雖經陞任一年差期未滿應令關納以陞銜仍留看守俟巴顏德等所修工程報完之後保過伏秋二汛再將石景山隄工一並交與永定河道管理於雍正四年六月初十日

奏本日奉

旨所議甚好欽此欽遵在案今已顏德等新築工程自
金溝口石隄起至下壩臺止共二百六十八丈一
尺五寸粘補修砌片石碎石石子隄共二百零二
丈二尺加高土隄五百八十丈零七尺築順水壩
一座開引河一道長三百三十丈既經告竣已顏
德等奏請

遣官查核臣部應會同內務府前往查明將做過工程
所用銀兩奏銷外現今餘剩銀六百六十九兩四

錢五分零令即繳還內務府其新築隄工巴顏德等既稱同効力人員情願保固三年等語應如所請俟雍正七年伏秋汛後再交與永定河河道管理除巴顏德等所做工程外將關納看守舊有隄工及傅爾賽名下賠修之壩臺四座片石隄八丈俟臣部會同內務府查明工程後應遵

旨交與永定河河道管理關納令其回戶部辦事其光祿寺署正覺羅阿那哈戶部郎中王式曾亦照巴

顏德等所請令其回處行走戶部郎中呂耀曾禮
部員外郎尚崇坦令其回部辦事傅爾賽應賠銀
兩行文該旗著落傅爾賽家產勒限嚴催交還內
務府至巴顏德等在工同効力人員俟工程保固
三年之後應否議叙之處另行請

旨謹

奏奉

旨依議欽此

雍正五年六月初二日工部為查明

奏銷事臣等查得先經副都統覺羅巴顏德等奏稱
石景山修理隄岸等工共用過內庫銀七萬五千
一百二十五兩零伏乞

遣官查核至新修築隄工仍交臣等同効力人員看守
保固三年再交永定河河道管理其原任監督郎
中傅爾賽應賠修之工交與臣等修建之挑水壩
四座石隄八丈前題請支領過內庫銀四千五百

兩實用銀三千八百三十兩五錢四分零餘銀六百六十九兩四錢五分九釐仍繳內庫其傳爾賽應賠銀兩行文工部轉行該旂嚴追還項等因經臣部

奏明今會同內務府總管前往石景山查看副都統覺羅巴顏德等新築工程自金溝口石隄起至下壩臺止共二百六十八丈一尺五寸粘補修砌片石碎石石子隄共二百零二丈二尺加高土隄五

百八十丈零七尺築順水壩一座開引河一道長
三百三十丈用過銀七萬五千一百二十五兩八
錢六分五釐傳爾賽賠修工程用過銀三千八百
三十兩五錢四分一釐查對冊內現今丈尺數目
相符因巴顏德等修理隄工所開白灰每千觔銀
九錢四分片石每方銀一兩九錢傳爾賽賠修之
工所開白灰每千觔銀一兩四錢片石每方銀二
兩三錢將多寡不一之處行查去後今巴顏德等

雖稱所用片石白灰前工係秋冬之交修理腳價
少省傳爾賽賠修之工係五六月間修理正值道
路泥濘腳價騰貴照依時價辦理等語但傳爾賽
賠修工程料物價值臣等細行核算終屬浮多應
將白灰每千觔片石每方各減去銀一錢計銀一
百七兩七錢三分零其築打土隄向無動用小夯
之例今巴顏德等築打土隄所開小夯每土一方
用工價銀九錢白灰九百觔較之大夯每方多用

銀四錢五分白灰三百觔應照大夯例核算減去
小夯工價白灰銀一千三百八十五兩三錢三分
零再成砌大石隄所用灌漿白灰每長一丈寬厚
一尺用灰一百五十觔亦屬浮多今每長一丈寬
一尺厚一尺五寸准給漿灰八十觔核算應減去
漿灰等項銀一千六百二十四兩九錢七分零拘
抵石縫油灰每方丈用油灰一百二十五觔今每
方丈准給油灰三十觔核算應減去油灰銀一千

七百二十九兩三錢五分零共減去銀四千七百
三十九兩六錢五分零傳爾賽賠修工程內減去
白灰片石銀一百七兩七錢三分零小芬工價白
灰銀八十六兩八錢三分零油灰銀四十九兩二
錢九分零共減去銀二百四十三兩八錢五分零
二共減去銀四千九百八十三兩五錢零至所開
引河一道攔水壩一座因係攔水引溜以便成砌
石隄隄成之後其引河攔水壩雖現今衝淤所有

用過夫役料銀兩應准開銷查巴顏德等築砌隄工原用過銀七萬五千一百二十五兩六錢六分零今各項減去銀共四千七百三十九兩六錢五分零其築砌隄工實用銀六萬五百八十七兩六錢二分零開挖引河築攔水壩實用銀九千七百九十八兩五錢九分零共用過銀七萬三百八十六兩二錢一分零准其開銷其減去銀四千七百三十九兩六錢五分零應令巴顏德等照數追

還內庫再傳爾賽賠修工程原用過銀三千八百三十兩五錢四分零內有應減去銀二百四十三兩八錢五分零其減去銀兩亦著落巴顏德等繳還內庫其傳爾賽應賠銀三千五百八十六兩六錢九分零行令該旗仍著落傳爾賽名下作速照數嚴追繳還內庫再查巴顏德等餘剩銀六百六十九兩四錢五分零係應即交之項至今尚未繳庫勒限五日內繳送內庫如限內不交相應交部

議處至修成大岸博岸搭脚手架子共買用過稍
架木四百三十根應令巴顏德等照數繳回工部
木倉收貯其新築工程巴顏德等既稱係動用內
庫錢糧修築情願同効力人員保固三年傳爾賽
應賠工程亦係巴顏德等動用內庫錢糧新築之
工相應一併交與巴顏德等看守俟保過雍正七
年伏秋二汛之後再交與永定河河道管理至員
外郎關納看守舊有隄工仍照原

奏交與永定河河道管理員外郎關納令其回戶部
辦事謹

奏奉

旨依議欽此

雍正五年十月十五日工部為

題明事議覆河道總督齊蘇勒等題銷堵築朱家口

用過工料銀兩一案奉

旨河工追賠之項其中情由不一有該員侵蝕入己者

有修築草率本不堅固易致衝決應當賠修者有當
潰決之時該員預知例當賠修以少報多先留地步
者甚至有故意損壞工程以便興修開銷者種種弊
端不可枚舉皆屬法難寬宥但亦有經手之員本無
情弊而照例則應分賠者在該員則情稍有可原而
承追之時無力全完亦於國帑無益朕意欲開恩稍
為變通其如何酌量分別定例方為妥協之處著九
卿詳議具奏此本內朱家口工程因從前並未題估

是以該部駁查隨經總河將經手人員即派令分賠
果否情理允協而於錢糧無虧之處著一併議奏欽
此欽遵臣等伏讀

諭旨仰見我

皇上睿慮周詳洞悉河防之情形

聖慈宏大特施恤下之深仁令臣等悉心詳議稍變通
於常法之中務盡協乎情理之當此誠

聖主軫念河工之至意也臣等查得河工關係重大追

卷之二十二

賠之項議處不一雍正四年九卿會議承修之員
估計工程總河副總河督撫分司委員確查工段
丈尺椿埽料物如估計過多存心浮冒即照溺職
例革職承查之員扶同徇隱照徇庇例議處至工
完之日該總河督撫分司再行確勘如工程單薄
料物尅減錢糧不歸實用以致修築不能堅固將
承修之員指名題參照侵欺錢糧例治罪其侵欺
銀兩著落該員家產追賠還項奉

旨依議欽遵在案雍正五年奉

旨河工不肖之員有將完固隄工故行毀壞希圖興修
借端侵蝕錢糧者著齊蘇勒察訪奏聞於工程處正
法欽此欽遵在案是侵蝕入已修築不堅以少報多
先留地步及損壞工程希圖開銷種種情弊皆法
所不容斷難寬宥俱應遵照定例施行外其有河
水陡漲人力難施該員本無情弊而照例則應分
賠者雖法無可貸而情有可原至承追之時力不

能完雖嚴加追比終無裨於庫帑此

聖主宏慈所為殷殷軫念欲加寬恤者也竊惟河流衝
決堵築搶修雖動用帑金而工程現在可以按
驗稽查非若侵盜錢糧虧空無存者可比臣等謹
遵

聖諭酌量變通查定例內稱黃河隄岸定限保固一年
運河隄岸定限保固三年如黃河一年之內運河
三年之內河水漫決者令經修官賠修黃河一年

之外運河三年之外河水漫決者令防修官賠修等語如果修築不堅防守不謹自應照例賠修若修築堅固防守謹嚴而忽遇河水驟漲人力難施以致衝決者仍照定例概令分賠其情誠有可憫臣等請嗣後黃河一年之內運河三年之內隄工陡遇衝決而所修工程實係堅固於工完之日已經總河督撫保題者止令承修官賠修四分其餘六分准其開銷如該員修築錢糧俱歸實用工程

已完未及題報而陡遇衝決者該總河督撫將衝
決情形並該員工程果無浮冒之處據實題保亦
令賠修四分其餘俱准開銷如黃河一年之外運
河三年之外隄工陡遇衝決而該管各官實係防
守謹慎並無疎虞懈弛者該總河督撫查明具
題止令防守該管各官共賠四分內河道分司知府
共賠二分同知通判守備州縣共賠一分半縣丞
主簿千總把總共賠半分其餘六分准其開銷其

承修防守各員俱令革職留任戴罪効力工完之日方准開復倘總河督撫有保題不實者後經查出照徇庇例嚴加議處所修工程仍照定例勒令各官分賠還項如此則各員感沐浩蕩之

洪慈益加懃惕奮勵而工程堅實河防鞏固矣是否允協伏候

聖恩欽定再查朱家口工程於雍正三年六月據河臣齊蘇勒疏稱黃河陡漲人力難施將睢寧縣朱家

口隄工漫坍四十餘丈續又刷寬三十餘丈請先
借庫帑堵築完固用過銀兩著落疎防各官名
下追還等語續據該督造冊題銷工部議以從前
並未題估行令查明具

題今該督將應賠銀兩著落革職同知李世彥賠銀
十萬二千四百九十餘兩原任淮徐道張其仁守
備楊九奏知縣牟慤主簿趙烺千總劉國傑各分
賠銀二萬四百九十餘兩但朱家口越築大壩用

銀八萬九千九百餘兩工部以該督並未報明工程丈尺現在駁查相應行令總河備細據實查核照各該員應賠應免分數另行分晰具

奏到日再議可也謹

題奉

旨依議欽此

雍正五年十二月初七日 和碩怡親王

奏為請定直隸河工等事竊照直隸興修水利營田

乃我

皇上軫念民生規畫久遠為萬世圖永賴之利也凡一切工程保守防護必有一定年限方能專其責成查定例黃河工程定限保固一年運河工程定限保固三年若直隸河道工程子牙河則係民力修防天津以南運河則係淺夫修防永定河北運河則係分司歲加修理皆無保固年限臣等酌其水勢平險工程難易請將子牙河及天津以南運河

新修工程俱照運河例定限保固三年永定河新
修工程照黃河例定限保固一年北運河工程較
之永定河稍為平易較之南運河則為險要請定
限保固二年倘限內衝決照例著落承修官賠修
至於歲修工程現今四道各有額設銀兩其應增
應減之處俟一二年經試汎水之後酌量定數另
行

奏

聞臣等未敢擅便伏乞

皇上睿鑒

勅部議覆施行等因奉

旨依議欽此

雍正八年正月三十日 和碩怡親王

奏為請

旨事臣查石景山隄岸工程除工部舊管二千七百六十餘丈外其餘埽壩新築隄工情願保固三年再

交永定河道管理隨經工部議覆奉

旨依議欽此在案雍正七年秋汛後巴顏德等保固限期已完臣隨於十一月內委令永定河道石柱會同巴顏德王景曾並工部所派看守工程之員外郎多綸查勘交收去後今據該道報稱新舊隄工俱各查收訖惟巴顏德等所修工段內片石石隄缺少二十二丈四尺零大石隄缺少一丈一尺石子隄缺少二丈八尺灰土隄缺少六十四丈三尺

零照例核算共該銀一千四十餘兩等語臣等伏查石景山隄工當永定之上游作京師之保障所關最為緊要今交永定河道管理雖事有專司較之工部派員管理每年更換者自屬有益但該道所管工程自盧溝橋至范疇口共計二百餘里兩岸隄工俱多衝險一遇汎水漲發上下奔馳數日方週今又益以石景山工程二十餘里不無鞭長莫及之慮雖舊有同知一員已兼管兩岸則石景

山所有隄工亦難遙顧應請添設同知一員令其
管理石景山一帶工程專司防護搶修之事仍歸
永定河道統轄再查永定河水勢湍急洶湧迥異
常流乘機溜轉利害於呼吸滾埽懸椿爭安危
於俄頃非河兵不能措手惟把總為能馭之以故
臣等於雍正五年二月內

奏請將把總張義陳留才暫行董率新設河兵辦理
如果著有勞績

奏

聞請

旨荷蒙

俞允今查該弁等効力三年實於河務有裨可否以千
總職銜食俸留工辦事以示鼓勵其暫留把總二
缺相應免其裁撤令該道於兵目內挑選頂替一
員分隸石景山同知管轄一員仍隸永定河同知
管轄其千總二員上下來往提調奔走如此則專

管有人臂指足使不惟石景山工程鞏固即通河
俱收實效矣其新修石景山隄工今年量撥銀兩
以資搶護容俟伏秋二汛後審定水勢再議加修
至巴顏德等所少核減工程銀兩應請交與工部
定議可也臣等未敢擅便伏乞

皇上勅部議覆施行為此謹

奏奉

旨俱照怡親王所請行欽此

雍正八年正月三十日 和碩怡親王

奏為請

旨事查永定河本名桑乾發源最高漚流甚衆故水性
湍激數徙善潰號稱難治自康熙三十七年

聖祖仁皇帝軫念民艱親臨指授新河既瀦橫流遂偃
肇錫嘉名河神之封自此而始我

皇上丕紹鴻緒加意河防發帑設官濬築之宜皆稟
睿算自雍正四年以來永定河安流順軌無改徙蕩齧

之患民居安集歲比有秋固人事之克修亦河神
之奉若而協於厥職雍正七年十一月內臣面奉
諭旨令於石景山一帶占度善地建作新廟以答靈貺
欽此欽遵臣親詣其地載矚載營謹勘得石景山之
南龐村之西有地一區長河西繞而南滌峰嶺北
紆而左驚於茲營建廟宇可稱形勝相宜祠址臨
流儼然有控壓波濤呵護隄防之勢遂委永定河
道石柱料估去後今據石柱呈稱新修廟座河神

正殿三楹東西配殿六間殿前鐘鼓樓二座旂杆
二根山門三間門外石獅二座對面戲樓一座東
西木牌樓二座殿後北極殿三楹再後子牆一道
門樓一座再後佛閣五楹兩旁僧寮十四間廟外
圍牆一道以上約共需工料銀一萬三千八百一
十五兩零臣又查得盧溝橋北岸舊有永定河神
廟即康熙三十七年新河成時之所建也

聖祖仁皇帝御製碑記及

御書匾額在焉

龍章鳳篆炳煥如新而廟之前後兩殿已就傾圯殘缺四面墻垣坍毀亦多擬將前後殿重加修建其園墻坍塌之處通行粘補並添造佛閣五楹所需工料銀兩亦令石柱料估約共銀三千三百七十餘兩竊思永定全河石景山據其上游盧溝橋扼其衝要二廟相望數十里內形勢聯接殿宇既啟丹牖斯崇神實憑焉以福我兆民落成之後更祈

皇上御製匾額碑文昭示神人俾永恪乃事自此長虹

偃波多魚占歲

畿輔生民永沐

皇仁於無既矣所有查勘過修廟緣由理合具

奏謹繪圖恭呈

御鑒伏祈

皇上睿鑒指示施行謹

奏奉

旨依議所用錢糧著在內庫支領二處廟工俱交與石
柱辦理欽此

雍正十年三月初十日直隸河道總督臣王朝恩
協理北河事務臣徐湛恩謹

奏竊查河工修防每年有歲修搶修大修不等除大
修工程隨時另請錢糧外其歲搶二修預於霜降
後撥發預備銀兩趲辦物料運貯工所一俟春融
即便興工於汛水前一律完整以資捍禦此定例

也前署河臣劉於義奏請歲修工程於歲內題估
來年二月動工四月完竣所議允協大學士臣朱
軾以隄岸工程報冊後續有坍塌裂者必令隨時報
修又不在隔歲估報之限等語查此係搶修工程
隨時趨做所用錢糧應彙入搶修項下另行

奏銷無庸另行估計至於大修工程有石土壩工之
別劉於義奏請大工不能速完者五六兩月停其
工作朱軾覆奏如係險要工程雖五六月亦未便

停止等語臣等詳審酌議如建砌石工創築土工
為經久之計者工程浩大動輒經年應請五六月
農忙時暫停工作若加幫土隄挑挖引河建築埽
壩等項均係緊要工程應亟於汛前趨完雖五六
月亦未便停其工作也是否允當伏乞

皇上睿鑒謹

奏奉

硃批所議是應達部者咨部存案可也欽此

雍正十年四月初三日大學士鄂爾泰等議覆直隸河道總督王朝恩等

奏請建築重隄等因奉

旨大學士鄂爾泰張廷玉蔣廷錫朱軾會同定議具奏
欽此臣等查得雍正三年改濬永定新河自何麻子
營起至范甕口入三角淀南北隄外挖土之處皆
定方坑八年秋汎漫溢流入方坑不致為患是以
從前河道石柱有照舊設立遙隄遙河之議其意

以河流散漫無底有遙隄為之捍禦遙河為之容
洩可免泛溢隄外淹沒田廬之患而不思傍河村
莊有在遙隄之內者設遇汎漲廬舍先已被淹石
柱所議固未周備定柱以原議建築遙隄之處離
河太近請移於二三百丈之外隄內村莊另築護
村小隄等語夫汎水驟溢非小隄所能捍禦既不
保固村莊且離大隄二三百丈其間土田漫漫者
必多所議實屬無益至王朝恩議從小廬家莊東

接大隄築起下連大隄之尾中築橫隄百餘道即有溢水之來遇格而止止則成淤淤則大隄益加鞏固等因但漫水衝突而來百餘道層層阻擋內不能容受勢必四散潰出不惟前衝遙隄且恐回溜宕激河岸尤為可慮臣等詳閱河圖公同酌議新河南岸切近大淀且有舊河分洩毋容修築其北岸自壩臺起至三角淀七十餘里中間並無宣洩之處應於大隄之外數十丈修築重隄

一道務期高寬堅厚其築隄挖土之處自成河形
但河底河身尚須畧加修濬所用錢糧亦屬無多
大隄即有橫溢之水有七十餘里之小河可以容
減其散漫之水自不致於潰決其間村莊廬舍惟
何麻子營小廬家莊大廬家莊三處在重隄之內
而此三村民舍無多應酌量給與遷移架造之費
擇徙善地此人所樂徙於民情並無未協其定柱
所議范甕口挑河二百丈徙六道口會歸入淀之

處似屬可行應令總河王朝恩等測量地勢之高下水性之順逆妥酌定議將各項工程確估具

題於今年秋汛後興工再臣等議得遙隄遙河乃預備補救之法其緊要工程全在歲修查永定河水性善淤其下流出淀之處河道狹隘尤易淤填務須不時疏濬使尾閭通暢庶上流不致壅滯泛衝其兩岸隄工沙土鬆浮須密種柳樹以護隄根逐年加高培厚務令堅固凡有險要之處廣儲料物

臨時多撥員役巡防搶護庶保無虞應令總河王朝恩等一并詳查確議具

奏奉

旨依議欽此

雍正十年十二月初九日工部為請

旨事會議得直隸河道總督王朝恩等疏稱永定河建築重隄一案准咨行據永定河道定柱估詳相距大隄以四十丈為率頂寬一丈四尺底寬六丈高

一丈二尺自何麻子營起至范甕口計長一萬三千六十七丈共築隄土方工價銀六萬三千八十四兩四錢五毫其築隄用土即按河形挑挖以成重河無庸另加挑濬之費務期一律深通而重河之下尾上接范甕口下接鄭家樓中間計長二百丈挖面寬五丈底寬三丈五尺深三尺共計土方工價銀一百七十八兩五錢再何麻子營等村瓦土草房並房基場園地畝照例核算共需銀二千

一百一十一兩三錢七分四釐零因係緊要工程
即令該道將庫存歲修銀兩按戶給發務使民沾
實惠仍取該縣並無扣短印結備案其動撥銀兩
題請帑銀到日撥給歸款以上隄河房地價值
照例估計共需銀六萬五千三百七十四兩二錢
七分四釐零應請仍在水利錢糧庫動支給發飭
令興工如式堅固工完查核題銷至房基錢糧及
建築重隄圈入民地俟工完行令地方官確查細

數請帑給價除糧再查大學士臣鄂爾泰等議
逐年加高培厚疏濬尾閘洵為善法但向來額設
歲修銀一萬五千兩不敷辦料僱夫之需每年汛
期未滿即請續發銀兩今又建重隄修浚更不敷
用應請每年再添設歲修銀五千兩以備疏浚之
用如有不敷再行請領倘有贏餘留為次年動用
仍嚴飭道廳員弁加謹修防錢糧務歸實用工程
必期鞏固實於隄岸民生均有裨益理合題估等

因前來查永定河建築重隄工程先據該督等以
何麻子營小盧家莊大盧家莊三處在重隄之內
應酌量給與遷移架造之費擇徙善地所議范甓
口挑河二百丈從六道口會歸入淀之處似屬可
行應行令總河王朝恩等測量地勢之高下水性
之逆順妥酌定議將各項工程確估具題於今年
秋汛後興工再查永定河兩岸隄工沙土鬆浮湏
密種柳樹以護隄根逐年加高培厚務令堅固凡

有險要之處廣儲料物臨汛多撥員役巡防搶護
庶保無虞應一並詳查確議具奏等因奉

旨依議欽此欽遵抄出到部臣部於本年四月內行文
在案今據該督等疏永定河建築重隄土方工
價銀六萬三千八十四兩四錢五毫而重隄之下
尾計長二百丈共計土方工價銀一百七十八兩
五錢再何麻子營等村風土草房並房基場園地
畝照例核算共需銀二千一百一十一兩三錢四

分四釐零因係緊要工程即令該道將庫存歲修銀兩按戶給發務使民沾實惠其動撥銀兩題請帑銀到日撥給歸款以上隄河房地價值估需銀兩仍在水利錢糧庫動支給發飭令興工如式堅固工完查核題銷等語臣部查瓦土草房並房基場園地畝共需銀三千一百一十一兩三錢七分四釐零係應給之項應准其在於庫存歲修銀內按戶給發務使小民均沾實惠其動撥銀兩應如所

題行令該督等在於水利錢糧庫內動支銀六萬
五千三百七十四兩二錢七分四釐九毫內將動
撥道庫歲修銀兩照數撥還歸款其餘銀兩給發
承修之員飭令上緊募夫挑築如式堅固工完將
修過工段丈尺及用過銀兩一并據實照例造冊
題銷所有房基錢糧及建築重隄圈入民地俟工
完行令該地方官確查細數造冊請 帑給價除
糧之處應令該督等造具確冊報明戶部又該督

等疏稱大學士臣鄂爾泰等議逐年加高培厚疏
浚尾閘誠為善法但向來額設歲修銀一萬五千
兩不敷辦料募夫之需每年汛期未完即請續發
銀兩今又建重隄修浚更不敷用應請每年再添
歲修銀五千兩以備疏濬之用如有不敷再行請
領倘有贏餘留為次年動用等語應行令該督等
在水利營田庫內每年再添歲修銀五千兩以備
濬修之用歲底造冊

題銷如果實有不敷再行請領倘有贏餘留為次年動用可也謹

題奉

旨依議欽此

雍正十一年三月初十日工部為謹陳永定河緊要事宜事臣等議得直隸河道總督王朝恩等疏稱永定河上汎兩岸隄工風雨淋揭日漸卑薄今年汎水叠漲漫灘成淤隄工更覺低矮俱係湍激

頂衝應須普律增修接築鷺房隄工建築月隄南岸第一工起至上七工止北岸自第一工起至第五工止以內高六七尺為率計隄長四萬七千六百三十丈五尺共用土四十七萬二千五百八十三方六尺零共估需銀五萬一千九百八十四兩一錢九分六釐零造冊具題前來查永定河上汛兩岸隄工該督等既稱風雨淋揭日漸卑薄今年秋水疊漲漫灘成淤隄工更覺低矮俱係湍激頂

衡應湏普律增修接築鵞房隄工建築月隄以內
高六七尺為率計隄長四萬七千六百三十丈五
尺共估需銀五萬一千九百八十四兩一錢九分
六釐零等語應如所題准其修理仍行該督等俟
工完之日將用過銀兩據實照例造冊具

題查核可也謹

題奉

旨依議欽此

雍正十一年三月二十二日禮部為請

旨事議得石景山南龐村新建永定河神廟工告成神

像安座之日

遣員致祭其致祭禮文及

遣員之處交臣部請

旨等因具

奏奉

旨廟成致祭一次奉安神像再致祭一次餘依議欽此

欽遵臣部隨將在京各部院衙門侍郎以下四品
以上滿漢堂官職名開列具

奏奉

旨欽點內閣侍讀學士明福前往祭一次在案今據署
順天府府尹刑部左侍郎張照呈稱永定河神廟
神像已經安座開光等因報部隨令欽天監謹擇
得三月二十八日己酉致祭吉等語應如所擇日
期致祭一次祭品令該地方官預備祭文香帛交

該衙門備辦由臣部安置龍亭恭昇至

午門前陳設臣部堂官敬謹看閱派筆帖式一員敬
謹賁往今照例謹將各部院衙門侍郎以下四品
以上滿漢堂官職名開列具

奏恭候

皇上欽點一員承祭謹

奏奉

旨著派王以巽欽此

雍正十一年五月吏部為詳請分隸隄工以重河防事會議得直隸河道總督王朝恩等疏稱永定河南北兩岸於康熙四十三年間設立同知二員分管南北兩岸隄工後因兩岸並歸分司故將同知裁去一員查永定河自盧溝橋以下兩岸環長四百餘里工段綿亘以一廳而兼兩岸工程挨工查看數日方周若遇汎水漲發水猛溜急不能挽渡汎險工長顧此失彼上年永定河汎水三次大

漲臣等目擊險要情形雖經分飭道廳分途督率
搶護得保平穩但永定河道職任兼轄調度查驗
是其責成至於巡隄保固辦料修防必須專責廳
員以重責守仰懇

皇上恩准復設北岸同知一員分岸管理如蒙

俞允其北岸同知員缺容臣等揀選熟諳河務者題請
實授再北岸同知關防現在南岸同知兼管無庸
鑄給其衙署應照石景山同知之例歲給價銀八

十兩令其賃房駐劄半截河村查同知衙門應設
快手八名軍皂十二名轎傘扇夫七名門子二名
北岸除現裁存快手八名軍皂四名外應添設軍
皂八名轎傘扇夫七名門子二名其官俸役食房
價等項銀兩於布政司庫內照例支給等因前來
查永定河南北兩岸原設有同知二員分司二員
後經兩岸分司歸并一員管理故將北岸同知一
員亦歸南岸同知兼管遵行在案今該督既稱永

定河自盧溝橋以下兩隄環長四百餘里以一廳而兼兩岸工程若遇水漲溜急汎險工長顧此失彼仰懇

皇上恩准復設北岸同知一員分岸管理其同知員缺揀選熟諳河務者題補北岸同知關防現在南岸同知兼管無庸鑄給等語應如該督等所請永定河准其復設北岸同知一員令該督照例揀選銜缺相當熟練河務之員題補其同知關防現係南

岸同知兼管應無庸另行鑄給俟復設之員到任時移送管理隄工該督等疏稱北岸同知衙署應照石景山同知之例歲給價銀八十兩令其賃房駐劄半截河村查同知衙門應設快手八名軍皂十二名轎傘扇夫七名門子二名北岸除現裁存快手八名軍皂四名外應添設軍皂八名轎傘扇夫七名門子二名其官俸役食房價等項銀兩於布政司庫內照例支給等語亦應如該督所請北

岸同知衙署照石景山同知之例歲給價銀八十兩准其於半截河村地方賃房駐劄至應設快手軍皂等役除現在裁存快手八名軍皂四名外應添軍皂八名轎傘扇夫七名門子二名其官俸役食房價等銀准其在於司庫內照例支給造入地糧奏冊內報部查核雍正十一年五月二十七日奉

旨依議欽此

雍正十二年四月工部議得直隸河道總督顧琮
等疏稱今歲直屬永定及南北運諸河水勢平穩
桃汛俱各安瀾至永定一河渾流湍瀚全賴下口
深通庶上游得以暢注入淀乃淘河以南漸積填
淤正議挑濬引河以資洩宣乃竟自然開刷二十
餘里之程畚鍤不勞民力四千餘丈之遠疏排悉
出

天工等語伏惟我

皇上敬

天勤民至誠昭格是以河汎安瀾慶各工之鞏固神功顯
應闢自然之引河惟

聖心以河神福佑羣生應虔誠展祀以答靈貺其應行
典禮著臣部察例具

奏仰見我

皇上崇祀報功為民祈福之至意臣等伏查向例致祭
永定河神臣部將在京各部院衙門滿漢侍郎以

下四品以上堂官職名開列具

奏恭候

皇上欽點一員前往承祭今永定河神應照例

遣官一員承祭其祭品令該地方官預備祭文由翰林

院撰擬香帛由太常寺備辦其祭文香帛陳設於

午門前臣部堂官敬謹看閱安置龍亭恭昇至臣部

照例派筆帖式一員敬謹賚往致祭日期交與欽

天監選擇可也

雍正十二年八月吏部為敬陳河務管見請

旨勅議酌行事會議得直隸河道總督顧琮等疏稱請
分河汎之遠近而專經管之責成也伏查直屬河
道源派繁多從前未經分任總河之時雖曾設有
廳員各自管理然專防之官必須親在河干巡查
防護一徃回間多有千里之遙已覺鞭長莫及若
至大汎時水勢驟發一官難以分身每致顧此失
彼以應將各屬舊日所管之界內有地方窻遠者

改撥劃分彼此就近管轄再於緊要處所酌量添設河員則隨地各有專員防護不致疎畧臣等逐一查看如通永道屬之薊州一帶諸河山水迅急每年

陵糈轉運關係重大且京東各處河流匯歸薊運僅有分汎縣丞主簿呼應不靈應請添設糧河通判一員駐劄薊州管理京東諸河並令催趲薊運空重糧船驗看米色聽該道統轄以專責成至於廳汎各

員亦有路遠不能兼顧之處如清河道所屬之滹
沱河經正定府之平山等九州縣由保定之束鹿
至河間府河捕同知所管獻縣界內計長七百八
十里去順德府三百餘里若悉令順德府同知管
轄實難防範應就近撥歸正定府通判管轄頗為
順便束鹿縣有滹沱新工應添設管河主簿一員
以資防護其順德府所屬任縣大陸澤並寧晉洎
以南滏陽百泉牛尾浪溝普通洛泉沼澧等河仍

令順德府同知管理至潞龍一河係匯正定府以北之滋河沙河唐河至祁州三岔口合流而入白洋淀水勢湍悍迅急兩岸沙土浮鬆伏秋汛漲最關緊要應添設管河通判一員駐劄祁州管理唐沙滋並潞龍河兩岸工程再於蠡縣添設管河縣丞一員駐劄連子口專司修濬祁州添設管河州同一員分管本州及博野縣兩處民工其復設大名道屬分管之漳河夏秋霖雨暴漲遍野涌漫患

及城郭應於魏縣添設管河縣丞一員與大名元城兩縣縣丞分防河道又順天屬之牯牛新河經良鄉涿州固安至霸州會中亭河入東淀與永定河南岸相去咫尺應將良涿固三屬之牯牛新河就近撥歸永定道管轄霸州係牯牛河下流舊屬清河道仍令清河道管轄其良涿以北房山等處俱係山水小河並無隄防係霸昌道屬應就近撥歸霸昌道兼管稽查至天津道屬三角淀內長淀

等河係永定河下口乃達津入淀咽喉最關緊要永定河當清渾交會之所易至於墊此處向無專理之員係河間府河捕同知兼轄該員離彼甚遠實難兼顧三角淀應添設管河通判一員駐劄王慶坨疏濬永定河入淀下口即聽永定道統轄以成全河呼應之勢並將文安左各莊以東之石溝臺頭楊芬港楊家河至三河頭以下之一帶淀河及東子牙新河一并就近撥該通判管理疏通以

專責守再於武清縣添設管河縣丞一員東安縣
添設管河主簿一員酌量適中地方駐劄即令通
判管轄以資分理其泊河通判所管清河縣運河
二十里並故城縣之河道十六里泊河通判相去
遙遠應撥歸河捕同知管轄天津同知所管南皮
縣運河與天津間隔與泊頭相近就近撥歸泊河
通判管理再靜海縣唐官屯千總所管運河隄岸
錯雜於靜海青縣滄州南皮四州縣境內間隔四

百餘里往來防護實多未便今天津改衛為府所
有屯糧已歸各州縣征收是千總所管河隄亦應
各按疆界歸於各州縣管轄庶就近修防不致貽
悞其千總一員即令督率河兵淺夫無煩裁汰所
增丞倅大小佐貳共計九員而通省專防分管方
能均有責成似於河防稍有裨益等語應如該督
等所請通永道屬之薊州准其添設糧河通判一
員駐劄薊州令其管理京東諸河並催趲薊運空

重糧船驗看米色聽通水道管轄以專責成清河
道所屬之滹沱河准其就近撥歸正定府通判兼
管束鹿縣准其添設管河主簿一員以資防護其
順德府任縣大陸澤並寧晉泊以南滏陽百泉等
河應撥令順德府同知管理潞龍一河准其添設
管河通判一員駐劄祁州管理唐沙並潞龍河兩
岸工程蠡縣准其添設管河縣丞一員駐劄蓮子
口專司修濬祁州准其添設州同一員分管本州

及博野縣兩處民工大名道屬之魏縣准其添設
管河縣丞一員令其與大名元城兩縣縣丞分防
河道又順天府屬之良涿固三處之牯牛河准其
就近撥歸永定道管轄霸州仍令清河道管理其
良涿以北房山等處准其就近撥歸霸昌道兼理
稽查天津道屬之三角淀准其添設管河通判一
員駐劄王慶坨令疏濬永定河入淀下口文安縣
左各莊以東之石溝臺頭揚芬港楊家河至三河

頭以下之一帶淀河及東子牙河一并俱撥歸該
通判管理聽永定道管轄以專責成武清縣准其
添設管河縣丞一員東安縣准其添設管河主簿
一員俱令該督等酌量於適中地方令其駐劄聽
該通判管轄以資修理至泊河通判所管之清河
縣運河二十里並故城縣之河道十六里准其就
近撥歸河捕同知管轄天津同知所管之南皮縣
運河准其就近撥歸泊河通判管理靜海縣唐官

屯千總所管運河隄岸准其各按疆界分撥各州縣管轄唐官屯千總令其督率河兵淺夫毋庸裁汰以上添設管河通判三員州同一員縣丞三員主簿二員俱令該督等會同直隸總督於現在屬員內揀選熟諳河務之員題請補授又疏稱請照例預備搶修料物酌定錢糧工程之責成也查河工汛發全藉搶修必物料能蓄於平時而後捍禦可期於旦夕直屬永定通永二道俱有預行備料

之例獨天津清河二道尚未設有搶修銀兩每至
汎水漲發一時急用不但物料不精價值倍昂往
往有可以搶護之工而因物料購買艱難至於漫
溢潰決多費帑金甚非先事綢繆至計臣等已
檄行天津清河二道循照永定通永之例酌其工
程險易量動道庫歲修銀兩預行採辦應用料物
分別堆貯工所該道查明造冊申送查核動用之
後即於歲修銀兩報銷未用及餘剩者仍加謹收

貯以備後日之需難以久存者變價另辦新料但各道規條不能畫一如通水道一切工程錢糧向係河道經管酌委廳員領辦永定道一切工程係廳汛各員領銀承辦查通水道所轄河工北運最關緊要而經由武清縣境內居多河道綿長該縣難以分身兼理自應照舊責成廳汛河員承修辦理永定河經由之州縣俱非瀕河附近且汛發甚驟搶修防護呼吸難緩亦應責成專守之廳汛各

官照舊經理惟天津清河二道屬其工程物料向係州縣印官領銀承辦聽汎各員雖同有河工之責竟若毫無聯屬查河工專汎河官係州縣佐貳似應聽州縣官督率協同辦理應將天津清河二道所屬河工凡有應行修築之處州縣率領汎官會同料估聽員核實加結詳報其需用物料人夫州縣便於呼應悉令採買僱募交送工所責令專汎河員常川在工督率稽查修築如式一切夫工

土方價值面同州縣官照例發給廳員稽其浮冒
侵扣工完之日州縣印官聯銜出具保固印結廳
員加結送查如有疎虞廳汛印官一例處分庶彼
此共任責成無推諉歧視之弊仍令本管道員總
理稽查凡有料物不齊工程不固及勾通營私觀
望歧悞者據實揭報徇庇扶同一并嚴叅再大名
道係復設衙門兼理分任河務並無歲修銀兩其
所分河汛原係清河道總轄應於清河道歲修銀

一萬五千兩之內酌量分撥三千兩於大名道庫貯以備各工需用其歲搶各工領辦承修亦均照清河道之例庶先期有預防之物料而要工不致臨時遲悞等語應如所題行令該督等將天津清河二道河工凡有應行修築處所該管地方州縣率領汛官會同料估造冊詳報廳員廳員核實加結轉詳該管上司照例題請修築其需用物料人夫等項該州縣悉令催募交送工所備用至於修

築之時該管河道飭令專汛河員常川在工督率稽查將一切夫工土方價值面同州縣印官據實照例發給毋致尅扣短少如印官員弁不行給發致有物料不堪侵扣浮冒等弊該督等即將專責稽查之廳員及發給不實之廳汛員弁一并題叅至工完之後如廳印汛員不照例加謹保固限內致有疏虞將廳員題叅交部議處仍令該管河道總理稽查倘有料物不齊工程不固及勾通營私

觀望歧悞等情訪聞確實即將該管河道指名題
叅以專責成其所辦物料銀兩酌其工程險易量
動道庫歲修銀兩預行採辦動用之後即於歲修
項下報銷其大名道歲搶各工領辦承修亦應如
該督等所題准其照清河道之例動歲修庫貯銀
兩預行採辦物料分別堆貯工所以脩應用倘承
辦物料於該年動用之後有未用餘剩者令該道
加謹收貯以備後歲搶修之用並將預行採辦物

料銀兩清河道歲修銀一萬五千兩之內酌量分撥三千兩於大名道庫貯以備各工需用其各工領辦承修亦應照清河道之例報銷又疏稱請酌標員之駐防練椿埽之實用督標左營中軍副將一員都司一員駐劄河西務左營遊擊一員駐劄張家灣守備一員駐劄天津但左營之催黃汎右營之西儀汎與河干寫遠所有把總二員馬兵共十四名守兵共六十二名徒列臣標並無河務實

用應將二汛地方兵弁仍行撥天津鎮標管轄便
於操習不致廢弛營伍至南運沿河一帶營汛俱
非臣標所轄凡有水勢汛漲呈報稽遲致干有悞
防護查南運河之安陵鎮與東省接壤為上游扼
要之地應請將鎮標之營汛馬兵十一名步兵四
十二名並隨營千總一員撥歸臣標管轄稽查上
游河道呈報水勢協同文員防護工程其操練營
伍及催趲漕船仍令河間協兼轄至撥還未足之

馬兵步兵二十二名即將鎮標左右兩營通融酌
撥馬兵八名步兵十二名歸還臣標留轄以備差
遣一轉移間於河工營伍均有裨益再查各處河
道工程雖工員亦有畧知椿埽者然皆不能親身
設施惟有多年老練河兵及椿埽夫役日在河干
閱歷既不同汎時僱募朝來夕去與未悉底裏者
迥然各別是以南省各河工程深得若輩之力惟
北方向未講究及此且直隸南運河止有淺夫並

無熟諳椿埽夫役應請於永定河北運河兵內揀
選熟諳椿埽兵丁數名暫放頭目教習南運河淺
夫辦理椿埽搶護等工即歸唐官屯千總管轄其
清河道屬潞龍並淀河工程在在險要既無淺夫
又無椿埽夫役伏秋兩汛搶護維艱應照江南運
河之例請將潞龍河兩岸添設椿埽夫二十四名
淀河添設椿埽夫二十四名大名道屬漳河緊要
向無河兵埽夫亦應照例添設椿埽夫十二名均

在於永定北運河兵內揀選熟諳兵丁專任辦理
教導民夫以備上下搶護要工以上各河兵如果
教習勤慎熟練河工應照永定河北運河之例拔
補管河外委千把以示鼓勵至於潮白二河伏秋
汛發水勢最關緊要潮河上游應添設管河外委
把總一員駐劄古北口白河上游應添設管河外
委把總一員駐劄石塘路查報水勢永定河上游
應添設外委把總一員駐劄水關照黃河報水之

例汛發用皮靛飽順流飛報預資防護則營汛駐防俱於河干相近而椿埽防護亦得收其實用等語亦應如該督所請河營左標催黃口汛右營西儀集汛把總二員馬兵十四名守兵六十三名仍行撥歸天津鎮標管轄將鎮標之安陵汛馬兵十一名守兵四十二名隨營千總一員撥歸河標管轄協同文員防護工程其操練營伍催趲糧船仍令河間協兼轄再於鎮標左右二營內酌撥馬兵

八名步兵十二名歸還河標以補撥出之數永定
河北運河兵內揀選熟練樁埽兵丁數名放為頭
目教習南運河淺夫歸唐官屯千總轄潞龍河淀
河各添設樁埽夫二十四名漳河添設樁埽夫十
二名均在永定北運河兵內揀選熟練者充補專
任辦理教導民夫如果教習得法河工無悞准其
遇有管河外委千把缺出考驗拔補至潮白二河
永定河各添設管河外委把總一員查報水勢仍

令該督將抽撥弁兵並挑選河兵充補埽夫名數
以及駐劄分防汛地事宜造具清冊送部查核又
疏稱一切官役俸工衙署等項以及應行事宜臣
再會同直隸總督核議另題等語應俟

命下之日令該督會同直隸總督妥酌定議具

題再議可也謹

奏奉

旨依議欽此

雍正十三年六月十八日工部議得直隸河道總督朱藻等疏稱竊查地方州縣遇有陞遷事故其新舊授受之際例應交代誠以一經交代則徹底清查水落石出既可察前任經手之弊又可杜後員推諉之端法至善也至河工廳汛官員雖無刑名錢穀之責而經管工程錢糧以及存貯料物堆積土牛栽植柳株管屬兵夫等項均關緊要緣向無交代定限處分是以接任之時並未清查交代

則工程有無殘缺錢糧有無侵蝕物料有無短少
霉爛土牛有無借用未補柳株有無枯損未栽兵
夫有無老弱頂替種種弊端新任之員茫然不知
及至交代之後始行查出而業已接受又不便再
行詳揭非代為賠累即指為前任之事藉詞推托
而舊任之員竟脫然無事揆厥所由皆因交代不
清之故臣等請嗣後河工廳汛各員無論實授署
事似應照地方官例扣限兩個月將經管隄埽工

程及錢糧物件一切事宜徹底清白造冊交送新任官查核新任官出具交代清楚印結由道加結呈送河臣衙門咨部如舊任之員並不交代明白或新任之員扶同徇隱以及勒措遲延並上司督催不力等情悉照例叅處至承修工程如在保固限內而該員因陞調緣事離任者仍著落承修之員保固不在交代之內再隄工堡房為兵夫棲息之所亦關緊要查定例豫省堡房如遇州縣官陞

遷事故令其造入工程錢糧項下接任官親詣隄
工驗明完固造冊具結咨送如有破壞接任官即
行揭報咨叅照炮臺邊界烽墩等項不修例議處
著令前官賠修完日開復今直隸各工堡房除民
修工程所蓋之堡房請照豫省之例責令該管州
縣交代外其

欽工所蓋之堡房應請責令該管汛官隨時查驗修葺
完固交代之時一體造冊咨部如有破壞照例叅

處著落前任之官賠修完日開復以上無論

欽修民修各工堡房俱責令該管廳員督察一體交代
如扶同徇縱聽其損壞並不修葺或被後任之員
或經該管道員揭報照炮臺等項不催之例叅處
如此交代明白則工程得以堅固錢糧均歸著實
於河防甚有裨益等因具題前來查先據河南山
東河道總督今授大學士仍管理江南河道總督
事務嵇曾筠於雍正八年四月內題准河工錢糧

照依倉庫錢糧定限兩月交代再定例內開官員
修造炮臺邊界烽墩等項不速行修造完結遲延
者降職一級修完之日還其所降之級不催之上
司罰俸一年等語今議將堡房如遇州縣官陞遷
事故令其造入工程錢糧項下接任官親詣隄工
驗明完固造冊具結咨送如有破壞接任官即行
揭報轉請咨叅比照炮臺邊界烽墩等項不修例
議處堡房著落前官賠修完日開復如該管之廳

員徇縱不加督察經道揭報比照炮臺等項不催之上司例議處如接任官因循接受即著接受之員賠修如堡房完固接受故意勒指照前官已將錢糧徹底清白造冊交代而新官推諉不接者罰俸一年例議處等因具題經臣部覆准移咨吏部載入例冊著為定例永遠遵行在案今直隸河工錢糧及存貯料物堆積土牛等項事宜應如該督等所題嗣後廳汛各員無論實授署事遇有陞遷

事故均照州縣倉庫錢糧之例將任內經管錢糧
支放數目並承辦隄岸埽壩工程及存貯一切料
物土牛細數定限兩個月造具四柱交代清冊移
送新任官查核新任官務將舊任經手錢糧有無
虧空工程有無殘缺物料有無短少霉爛抑株有
無枯損未裁兵夫有無老弱頂替逐一查明出具
交代清楚印結由道加結呈送河臣衙門查核咨
部如舊任官將錢糧物料工程等項不交代明白

或新任官扶同徇隱及勒指遲延並該管上司督催不力以致逾限等情該督即行查明照例

題叅議處所蓋堡房責令該管汛官隨時查驗稍有破壞即行修葺完固以資兵夫棲息之所交代之時飭令接任官查明有無破壞完固緣由照例造具交代冊結送部查核倘有破壞接任官即行揭報請叅著令賠修驗明完固

題請開復如該管廳員不加督察或扶同徇隱或損

壞堡房不令該管汛官隨時修葺一經揭報照炮臺邊界烽墩等項不催之上司例叅處至承修工程如保固限期未滿而該員遇有陞調緣事離任者不在交代之例照例著令承修之員保固期滿毋致疎虞可也謹

奏奉

旨依議欽此

永定河志卷十二